

## Headlines

- उपराज्यपाल मनोज सिन्हा होरें अज्ज गुलमर्ग च छेमी खेलो इंडिया स्यालू खेड्डें दे दुए गेड दा औपचारिक तौरा पर उद्घाटन कीता ते आखेआ जे एहू समारोह जम्मू-कश्मीर दी खेड्ड पंछान दा जश्र ऐ।
- मुख्मन्त्री उमर अब्दुल्ला होरें गुलमर्ग च मसनुई बर्फबारी दी जरूरत पर जोर पाया तां जे खित्ते च स्यालू खेड्डें ते सैलसफा दे भविक्ख गी सुरक्षित बनाया जाई सकै।
- सेना नै दस्सेआ जे किश्तवाड़ च पिछले 326 दिनें तगर चले दे अभियान च जैश ए मोहम्मद दे सिरे दे कमांडर सैफुल्लाह सने 7 आतंकियें गी मारी मकाया गेआ ऐ।
- जम्मू-कश्मीर च 2022 शा 32 ज्हार 500 शा मते नशीले पदार्थे दी तस्करी दे मामले दर्ज कीते गए न जिंदे शा सभनें शा मते मामले श्रीनगर ते जम्मू जिले थमां न।
- जम्मू-कश्मीर थमां सभनें शा घट्ट उम्मी दी भारती पैरा तीरंदाज शीतल देवी होरें गी उंदी प्रेरणादायक यात्रा आस्तै बोग वैल्यूज वुमन ऑफ एक्सीलेंस अवार्ड कन्नै सम्मानित कीता गेआ ऐ।

<><><><><><>

## LG-KIWG

उपराज्यपाल मनोज सिन्हा होरें अज्ज गुलमर्ग च छेमे खेलो इंडिया स्यालू खेड्डें दे दुए गेड दा औपचारिक तौरा पर उद्घाटन कीता। इस मौके पर बोलदे होई एल.जी होरें आखेआ जे एहू समारोह जम्मू-कश्मीर दी खेड्ड पंछान, एकता ते लोके गी खेड्डें कन्नै जोड़ने ते खडारियें दा दिल बधाने दा जश्र ऐ। देश दे बक्ख-बक्ख हिस्सें थमां आए दे प्रतियोगियें दा सोआगत करदे होई एल.जी होरें आखेआ जे उंदे जज्वे, कड़ी मेहनत ते खेड्ड दे प्रति उन्दे जोश कन्नै एहू समारोह होर मता रोमांचक बनोग। इस मौके उपपर बोलदे होई एल.जी होरें आखेआ .....बाईट.....

<><><><><><>

## CM-Winter

मुख्यमंत्री उमर अब्दुल्ला होरें स्यालू आहली खेडुं गी सुरक्षित रखने ते सैलसफा गी बढ़ावा देने लेई गुलमर्ग च मसनुई बर्फ बनाने दी जरूरत पर जोर दित्ता ऐ। खेलो इंडिया विंटर गेम्स दे शुरूआती समारोह दुरान बोलदे होई उनें आखेआ जे अनिश्चित बर्फबारी पारम्परिक स्यालू आहली खेडुं लेई चुनौती पैदा करा'रदी ऐ। मुख्यमंत्री होरें गुलमर्ग गी अंतरराष्ट्री स्तर उप्पर स्कींग खेडुं आहली थाह दे रूप च विकसित करने दी पक्क ध्याई दी ऐ। उनें खित्ते च स्यालू आहली खेडुं दे भविष्य गी सुरक्षित रखने लेई मसनुई ढंगे कन्नै बर्फबारी आहली प्रणाली गी यकीनी बनाने दी जरूरत पर बी बल पाया। मीडिया कन्नै गल्ल करदे होई मुख्यमंत्री होरें आखेआ

<><><><><><>

## Terrorist Eliminated

जम्मू स्थित व्हाइट नाइट कोर नै अज्ज आखेआ ऐ जे किश्तवाड़ जिले दे छात्रु इलाके च 326 दिनें तगर चले दे इक सांझे अभियान च 7 खूंखार आतंकवादिये गी मारी मकाया गेआ ऐ। आकाशवाणी दे जम्मू संवाददाता दी रिपोर्ट मुजब कोर नै अपनी इक पोस्ट च इस अभियान गी बड़ी मती दलेरी ते मजबूत धेइयै आहला अभियान दस्सेआ ऐ जिसी जम्मू-कश्मीर पुलस ते सी.आर.पी.एफ दी सांझी टीम नै आधुनिक तकनीके ते जबरदस्त खुफिया तंत्र राएं अंजाम दित्ता। तोआई, आई.जी.पी जम्मू भीम सेन टूटी होरें मीडिया कर्मिये कन्नै गल्ल करदे होई दस्सेआ जे सैफुल्लाह ते ओहदे जोड़ीदारें दा खात्मा क्षेत्र च आतंकी नेटवर्क गी इक बड़ा झटका ऐ। उनें आखेआ जे जम्मू शा आतंकवाद गी भलेआं खत्म करने लेई आम माहनू दा साथ बी बड़ा लाजमी ऐ। उनें आखेआ

<><><><><><>

## Rajouri

राजौरी जिले दी कोटरनका सुबदीवीजन च इक ऐतिहासिक विकास तैहत 14 जहार शा मते घरै तगर जल जीवन मिशन तैहत नलके आहलां पानी पजाया गेआ ऐ। जल शक्ति विभाग दे एग्जीक्यूटिव इंजीनियर सुदेश भगत होरें आखेआ जे ब्लॉक सी लेई पानी दी सप्लाई दियां 63 स्कीमें गी मंजूरी दित्ती गेई ऐ तां जे हर इक घर तगर साफ-स्वच्छ पानी पजाया जाई सकै। उनें आखेआ

<><><><><><>

## Drug Cases JK

सरकार नै जानकारी दिती ऐ जे बरे 2022 थमां जम्मू-कश्मीर च नशीले पदार्थे दे दुरूपयोग दे 32 ज्हार 500 शा मते मामले दर्ज कीते न जिंदे च सभनें शा मती गिनती श्रीनगर ते जम्मू जिले थमां दर्ज कीती गेई ऐ। समाजी न्याऽ ते अधिकारिता मंत्रालय नै सोशल मीडिया पर इक पोस्ट च आखेआ ऐ जे नशामुक्त भारत अभियान दे तैहत सभनें जिले च नशे आहली लत दे ईलाज सरबन्धी सहूलते गी समूलचे जम्मू-कश्मीर च निगर बनाया जा'रदा ऐ। एहदे च आखेआ गेआ ऐ जे सभनें 20एं जिले च नशामुक्ति सरबन्धी ओ.पी.डी सेवां बी चला'रदियां न, जिसले के 9एं सरकारी मेडिकल कॉलेज अस्पताले च आई.पी.डी सेवां उपलब्ध न जेहदे कन्ने ईलाज ते पुनर्वास सरबन्धी मदाद दी व्यापक पुज्ज यकीनी बनी जंदी ऐ।

<><><><><><>

## Sheetal Devi Award

जम्मू-कश्मीर लेई इक गौरवपूर्ण मौके पर किश्तवाड़ जिले दी पैदा तीरंदाज शीतल देवी होरे गी उंदी जीवटता ते प्रेरणदायक यात्रा आस्तै वोग वैल्यूज वुमन ऑफ एक्सीलेंस अवार्ड कन्ने सम्मानित कीता गेआ ऐ। सोशल मीडिया पर अपना आभार व्यक्त करदे होई शीतल होरे आखेआ जे उनेंगी उने महिलाएं दी फेहरिस्त च शामिल होने पर गर्व ऐ जेडियां पक्के धेइये कन्ने कुसै बी कम्म दी अगुवाई करदियां न ते होरने गी अगगे बधाने दे जत्त करदियां न। शीतल होरे पेरिस 2024 पैरालंपिक च मिक्स्ट टीम कम्पाउंड स्पर्धा च कैहू दा तगमा जित्तियै इतिहास रची दित्ता ते ओहू सभनें शा घट्ट उम्री दी भारती पैरालंपिक विजेता बनी गेइयां। उने होर कई प्रमुख अंतरराष्ट्री प्रतियोगिताएं च सुन्ने दे तगमे बी जित्ते दे न। दुनिया दी इकलौती महिला अंतराष्ट्री पैरा तीरंदाज दे रूपै च बगैर उप्परले अंगे दे मकाबला करने दे नाते शीतल हुंदा सफर दृढ निश्चय ते उत्कृष्टता दा वैश्विक प्रतीक बनी गेदा ऐ।

<><><><><><>

## CBC-Rajouri

सूचना ते प्रसारण मंत्रालय दे केंद्री संचार ब्यूरो नै आई.टी.आई नौशेरा च इक रोजा एकीकृत संचार ते आउटरीच कार्यक्रम दा आयोजन कीता। इस कार्यक्रम च वी.बी राम जी पोषण अभियान, कौशल विकास योजना ते राष्ट्री पशुधन मिशन सने महत्वपूर्ण पैहलकदमिएं गी उजागर कीता गेआ। भिडुं दे पालन ते ग्रामीण विकास दे अफसरें सने साबका पी.आर.आई सदस्यें इस कार्यक्रम च हिस्सा लैता। माहिरें दे लैक्चर, क्विज, न्यू इंडिया समाचार दे वितरण ते सांस्कृतिक प्रदर्शनें दे राएं जागरूकता गी बढ़ावा दित्ता गेआ। कार्यक्रम दरान प्रतियोगिताएं दे जेतुएं गी सम्मानित बी कीता गेआ। आकाशवाणी समाचार कन्नै गल्ल करदे होई सी.बी.सी राजौरी दे फील्ड पब्लिसिटी अफसर विजय मट्टू होरें आखेआ

<><><><><><>

### CBC-Udh.

तोआई, सूचना ते प्रसारण मंत्रालय दे केंद्री संचार ब्यूरो (सी.बी.सी) आसेआ स्टार्ट अप इंडिया, मिशन अरोमा ते भारत सरकार दी मती महत्वै आहली योजनाएं बारै पंज दिनें दा एकीकृत संचार ते आउटरीच कार्यक्रम उधमपुर दे जागतें दे डिग्री कॉलेज च शुरू होआ। एहू कार्यम 27 फरवरी 2026 तगर जारी रौहगा। उधमपुर पच्छिम दे विधायक पवन कुमार गुप्ता होरें सी.बी.सी फील्ड आफिस उधमपुर दे गुरनाम सिंह ते बक्ख-बक्ख अफसरें कन्नै इस कार्यक्रम दा उद्घाटन कीता। आकाशवाणी समाचार कन्नै गल्ल करदे होई विधायक पवन गुप्ता होरें आखेआ

इस दरान कॉलेज दे विद्यार्थिं इस चाल्ली दी पैहलकदमी लेई विभाग दे जत्तें दी सराहना करदे होई आखेआ

<><><><><><>

### Food Safety Ramban (Byte)

रामबन च खाद्य सुरक्षा विभाग नै रमजान दे पवित्र महीने दौरान खाने-पीने आली चीजें दी गुणवत्ता- स्वच्छता ते उपलब्धता गी यकीनी बनाने लेई खाद्य सुरक्षा उपाएं च तेजी लेई औंदी ऐ। इनें दिनें खाद्य सुरक्षा- पुलस-राजस्व ते लीगल मेट्रोलोजी मैहकमे दी इक सांझा टीम नै बजारें च खाने-पीने आली चीजें दा निरिक्षण कीता। निरिक्षण दौरान खाने-पीने आली चीजें खास करियै चिकन मटन- दुद्ध आले उत्पाद- फल सब्जियां ते मिठाइयें दी गुणवत्ता उप्पर मुख ध्यान दित्ता गया। अधिकारियें दुकानदारें गी खाने-पीने आली चीजें च मिलावट करने पर

जुर्माना ते कनूनी कारवाई कीते जाने दी गल्ल आक्खी ऐ। इस बारे रामबन दे खाद्य सुरक्षा अफसर बलबीर सिंह  
होरें आखेया

<><><><><><>